



Terenga 2: Hōtaka 13 – Kupu Whakarite

Ka ketekete te kākā, ka kotokoto te tūī, ka kūkū te kererū. Kei ngā manu o te wao nui a Tāne, mai i Muriwhenua ki Murihiku, hoki mai anō ki tā koutou hōtaka e tū nei hei rākau taumatua mō koutou.

Hei Mahi Whakarongo

Ko Wharehuia Milroy te kaikōrero o te rā. Ināhoki ko te whakawhiwhinga ōna ki tētehi tohu kairangi hōnore ka mātakitakihia e tātou ā kō tonu ake nei.

1. I pēhea tā ngā kaikōrero whakamārama i te āhua o Wharehuia?
2. Nā wai te tohu i whakawhiwhi atu ki a ia?
3. He aha te ia o ngā whakaaro o Tīmoti mō te kaupapa nei

He Whakamārama

Tirohia ēnei taurira o te kupu whakarite:

“E rangi, kei taku manu taupua. Kei taku mōtoi kahotea. Ka ngaro rā ngā whakahae o te wao.”
(Te Atairangikaahu)

“Kāti rā e taku tiki pounamu, e tōku kōkō tangiwai kua motu nei te taringa...” (Te Rangiāniwaniwa)

E whakatauritehia ana te tangata ki te manu, ki te pounamu, ki te taonga, ki te rākau rānei i ngā taurira o runga ake nei. He nui ngā momo kōrero pēnei i roto i te reo Māori. Ka mutu, he ātaahua rawa atu tēnei momo reo.

Anei ētehi taurira:

He kākā wahanui – He tautōhito whaikōrero.

He kanohi hōmiromiro – He tangata kaha ki te āta wetewete i te kōrero kia noho tika ai.

He kōkō tatakī – He tangata kaha ki te kōrero. He tangata whaikōrero.

He pāpera apu paru – He tangata horo kai, horomiti.

He tou tīrairaka – He tangata nekeneke, kāore e tau tana noho ki te wāhi kotahi.

Hei Manatu

tawhito / kaumātua

He nui ngā kupu rerekē i te reo Māori mō te kupu Pākehā ‘old’. Kei te āhua o te horopaki. Tirohia ēnei taurira:

1. How old are you? E hia ō tau? E whia tō kaumātuatanga? E hia tō pakeke?
2. That’s an old coat. He koti tawhito tēnā.
3. That’s my old school. Koinā taku kura o mua.

Hei whakautu i te pātai tuatahi mō te pakeke o te tangata. Tirohia ēnei taurira:

- 12 taku pakeke. ✓ 12 aku pakeke. x
12 aku tau. ✓ 12 taku tau. x E tekau mā rua aku tau. x

Hei Mahi

Kimihia mai he kupu whakarite mō te reo Māori.

Whakautu:

1. Ko te reo te taikura o te whakaao mārama. 2. He taonga te reo. 3. Ko te kai a te rangatira, he kōrero. 4. Tōku reo, tōku ohooho, tōku reo, tōku māpihi maurea, tōku reo, tōku whakakai marihi.